



MARKAS ANGKATAN TENTERA MALAYSIA
 BAHAGIAN HAL EHWAL AWAM-J7
 Wisma Pertahanan
 Jalan Padang Tembak
 50634 KUALA LUMPUR
 Tel: 03-40130078
 Laman Web: www.mafhq.mil.my

KENYATAAN MEDIA BERSAMA

KUALA LUMPUR

25 JUN 21 (JUMAAT)

(Dikeluarkan pada jam 5.00 petang)

PROGRAM TRANSFORMASI DIGITAL BAKAT ATM BAKAL LAHIRKAN USAHAWAN AHLI BAKAT B40

Kuala Lumpur, 25 Jun 2021 – Pengerusi Jemaah Tertinggi Badan Kebajikan Keluarga Angkatan Tentera (BAKAT) ATM, Yang Amat Mulia (YAM) Tengku Puteri Seri Teja Puan Sri Hajah Tengku Muhaini binti Almarhum Sultan Haji Ahmad Shah telah merasmikan Seminar Program Transformasi Digital BAKAT yang telah diadakan secara maya di Rumah BAKAT ATM, Kem Kementah hari ini.

Seminar selama tiga hari bermula dari 25 hingga 27 Jun 21 ini, merupakan antara fasa pertama dan “pilot project” dalam Program Transformasi Digital BAKAT dengan menggunakan platform *Learning e-BAKAT* yang dibangunkan oleh MGATE Emerging Technologies Sdn Bhd (MGATE). Seminar secara maya ini turut disertai oleh Pengerusi-Pengerusi Jemaah Tertinggi BAKAT Perkhidmatan, Penasihat BAKAT ATM dan ahli BAKAT Transformation Task Force (BTF).

Seminar secara maya ini merupakan sesi pengenalan kursus usahawan kepada 100 peserta yang merupakan ahli-ahli BAKAT daripada golongan B40. Mereka akan didedahkan kepada topik-topik asas untuk memulakan perniagaan dan sebagai pencetus idea untuk menjadi seorang *intrepeneur* yang berjaya. Seramai 8 orang panel telah dilantik bagi merealisasikan program yang bertemakan ‘**Dari Usahawan Kepada Usahawan**’ serta berpengalaman dalam memberikan semangat, rangsangan dan dorongan kepada peserta program.

Pelaksanaan seminar ini adalah sebagai langkah pertama di dalam pembangunan latihan dalam talian sebelum para peserta dibahagikan kepada dua kursus utama iaitu Kursus Jahitan melibatkan 44 orang peserta dan Kursus Kulineri (Masakan dan Pembuatan Kek) melibatkan 56 orang peserta.

Kedua-dua kursus tersebut dijadualkan untuk dimulakan pada awal Julai 2021 dan dijangka berakhir pada hujung Ogos 2021. Setiap kursus akan dilaksanakan secara dalam talian dengan menggunakan dua kaedah iaitu kelas pra rakaman (pre-recorded) dan kelas secara langsung (live) dengan tenaga pengajar yang mempunyai kepakaran dan berpengalaman dalam bidang berkaitan.

Dengan adanya *pilot project* ini, objektif Program Transformasi Digital BAKAT dalam membuka peluang kepada komuniti BAKAT bagi menjana ekonomi keluarga warga ATM melalui pendigitalan dan memanfaatkan kesan Revolusi Industri 4.0, dapat direalisasikan.

Program secara maya ini juga selari dengan dasar dan Prosedur Operasi Standard (SOP) COVID-19 semasa Malaysia selain mempamerkan komitmen BAKAT ATM dalam usaha untuk melengkapkan ahlinya dengan kemahiran serta ilmu keusahawanan, sekali gus melestarikan keupayaan institusi kekeluargaan warga ATM melalui pemerksaan aspek penjanaan ekonomi dengan lebih meluas.

NOTA TAMBAHAN:

1. Program e-BAKAT merupakan cetusan idea Pengerusi Jemaah Tertinggi BAKAT ATM iaitu Yang Amat Mulia Tengku Puteri Seri Teja Puan Sri Hj Tengku Muhaini binti Almarhum Sultan Hj Ahmad Shah. Program ini juga merupakan sebuah program yang dirangka di bawah Program Transformasi BAKAT: Halatuju Kedua – Pembangunan Ekonomi Keluarga bagi meningkatkan kemahiran serta pengetahuan ahli BAKAT untuk membentuk mereka menjadi seorang usahawan yang berjaya melalui perancangan dan platform yang sistematik. Ia juga bertujuan untuk memperkasakan mereka melalui pembangunan modal insan yang teratur dan berpotensi tinggi dalam menjana pendapatan tambahan sekeluarga.
2. Program yang dibangunkan oleh MGATE Emerging Technologies Sdn Bhd ini merupakan satu platform digital khusus serta program praktikal berdasarkan beberapa modul kursus yang komprehensif. Ia bertumpukan latihan keusahawanan yang akan diberikan kepada para peserta dengan penggarapan ilmu, latihan dan penaiktaraf kemahiran di dalam bidang-bidang yang telah dikenalpasti.
3. Berdasarkan berpengalaman luas di dalam pembangunan platform digital berasaskan "*Big Data*" dan juga *applied learning*, MGATE akan bertindak sebagai konsultan yang akan menyediakan tenaga pengajar, bahan kursus dan segala keperluan semasa pelaksanaan kursus. Program bermotokan "Dari Usahawan Kepada Usahawan" ini juga akan turut melibatkan pakar serta ikon dalam pelbagai bidang keusahawanan yang akan dijemput untuk bersama para peserta bagi memberi semangat, rangsangan dan dorongan.

4. Program e-BAKAT ini akan dilaksanakan secara berfasa di mana fasa pertama merupakan pembangunan platform latihan atas talian dan fasa kedua adalah merupakan platform "e-market place". Program yang dirangka bagi fasa pertama adalah meliputi kursus seperti berikut:

- a. Kursus Asas Keusahawanan.
- b. Kursus Asas Pendidikan Awal Kanak-Kanak.
- c. Kursus Asas Masakan.
- d. Kursus Asas Pembuatan Kek.
- e. Kursus Pembelajaran Agama.

5. Sebelum ini, iaitu pada 30 April 21 lalu telah diadakan Majlis Menandatangani Memorandum Perjanjian di antara Badan Kebajikan Keluarga Angkatan Tentera (BAKAT) ATM yang diwakili oleh Pengerusi Jemaah Tertinggi BAKAT ATM, Yang Amat Mulia Tengku Puteri Seri Teja Puan Sri Hj Tengku Muhaini binti Almarhum Sultan Hj Ahmad Shah dan MGATE Emerging Technologies Sdn Bhd. Majlis berkenaan bertujuan menyatakan secara rasmi pembinaan jalinan hubungan kerjasama serta kolaborasi bagi merealisasikan Program e-BAKAT. Majlis telah disaksikan oleh Menteri Kanan Pertahanan dan Panglima Angkatan Tentera.

6. - Turut dilangsungkan bersama majlis tersebut adalah pemeteraian perjanjian perkhidmatan di antara MGATE Emerging Technologies Sdn Bhd dan Human Resources Development Corporation (HRD Corp) iaitu agensi di bawah Kementerian Sumber Manusia yang bertanggungjawab untuk mengurus dan meluluskan dana bagi program latihan keusahawanan yang bakal diberikan kepada ahli-ahli BAKAT ATM.

- TAMAT -

"KEDAULATAN NEGARA TANGGUNGJAWAB BERSAMA